

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

„Allah vas iz trbuha vaših majki izvodi, i vi ništa ne znate, i daje vam sluh i vid i razum, da biste bili zahvalni.“ (En-Nahl, 78)

Poštovana braćo i sestre, nema nikakve sumnje da je Uzvišeni Allah čovjeka obasuo neizbrojivim blagodatima što naglašava i kur'anski ajet: **„A ako bi Allahove blagodati brojali, ne bi ih mogli pobrojati.“** (Ibrahim, 34)

Zauzvrat, Uzvišeni Allah od nas traži da ih koristimo kako treba i što je najvažnije - traži da Mu na njima budemo zahvalni.

Koliko je zahvalnost važna, najbolje govori činjenica da je Allah, dž.š., stavlja u istu ravan s imanom, pa u suri En-Nisa', 147., kaže: **„Allah vas neće kažnjavati, ako budete zahvalni i ako budete vjerovali.“**

Uvidjevši koliko je zahvalnost bitna, čovjekov neprijatelj Iblis stavio je sebi za cilj da ljude čini nezahvalnim.

Uzvišeni Allah nam u Kur'anu navodi Iblisove (la) riječi da bi nas upozorio: **„...pa ću im sprijeda, i straga, i zdesna, i slijeva prilaziti, i Ti ćeš vidjeti da većina njih neće biti zahvalna.“** (El-A`raf, 17)

Muhammed, s.a.v.s., klanjao je noću toliko dugo da bi mu stopala popucala. Upitan je zašto to radi kad mu je oprošteno sve. Rekao je: **„Zar da ne budem Allahov zahvalni rob.“**

Braćo i sestre, ne zaboravimo da je zahvalnost prvi ajet Kur'ani-Kerima: **„Hvala Allahu Gospodaru svjetova.“**

Hvala Allahu, kako saznajemo iz hadisa Muhammeda, s.a.v.s, prve su izgovorene riječi našeg praoca Adema, a.s., Uzvišeni Allah mu je rekao: **„Smilovao ti se tvoj Gospodar, zbog toga sam te i stvorio.“**

I posljednja molitva džennetlija bit će: **„Tebe Allaha, Gospodara svjetova hvalimo!“** (Junus, 10) *Ve ahiru da'vahun enil-hamdu lillahi Rabbil alemin.*

Pa jesmo li i koliko, zahvalni Uzvišenom Allahu na blagodatima koje uživamo? Svatko ima određene probleme i iskušenja koja nas udaljuju od zahvalnosti Allahu, dž.š.. Dunjaluk nas saletio; srca i umovi nam rasijani; sreća nam se

čini dalekom; plašimo se za sebe i svoje porodice; plašimo se krize i neimaštine; plašimo se bolesti i nemoći; strahujemo od ljudi, gubitka posla i slično.

Pri svemu tome, zaboravljamo kako imamo i bezbroj blagodati na kojima moramo zahvaljivati Uzvišenom Allahu. **A što je najvažnije, imamo blagodat slobode i mira.**

Dok ovo govorim, prisjetimo se slika koje svakodnevno gledamo; ubijene djece, žena i ruševine Aleppa, Hame, Ghoute i drugih unesrećenih gradova Sirije, Mijanmara, Palestine i Jemena. Osim tuge i nemoći, najviše iznenađuje brutalnost i svirepost bez ikakvih granica. Rezultat toga su stotine tisuća drugih. A žrtve su prije svega i uvijek iste: **nevini ljudi tih prostora i islam.**

Muslimanska nemoć ono je što najviše frustrira većinu muslimana.

Zato se zapitajmo da li nas lišava odgovornosti pred Allahom ako samo suosjećamo zbog ubijanja djece? Oslobađa li nas odgovornosti kada se samo zgražavamo nad vijestima o stotinama tisuća ubijenih i milijunima raseljenih muslimana Sirije, Jemena ili Mijanmara ili nad umiranjem gladne i promrzle djece u

izbjegličkim kampovima?

Jesmo li riješeni svake odgovornosti kada na slučajevne bratoubilačkih dešavanja samo konstatiramo da su to sukobi među mezhebima i slično?

Nažalost, udaljavajući se od islamskih načela, muslimani se sve više međusobno ubijaju. Sve to je izravna posljedica pomanjkanja zahvalnosti Allahu, dž.š..

Kao vjernici, trebamo biti uvjereni da će sve doći na naplatu: i sebičnost, i indiferentnost, i nezahvalnost i sve ostalo što doprinosi ovoj strašnoj tragediji.

Muhammed, s.a.v.s., je rekao da je kod Uzvišenog Allaha veći grijeh narušavanje dostojanstva jednog vjernika nego rušenje Kabe. Teško onima koji se ne osvrću i koje ne pogađaju stradanja ljudskih bića!

Poštovana braćo i sestre, stanovnici Istočne Gute, suočeni su s jednom od najvećih humanitarnih kriza 21. stoljeća. Riječ je o regiji koja je od početka rata u Siriji poprište najvećih razaranja. U posljednja tri mjeseca poginulo je više od 700, a posljednjih dana više od 200 civila. Već skoro godinu na područje nije moguće dopremiti dovoljne količine hrane i

medicinskog materijala. Djeca i bolesni umiru jer nemaju pristup dovoljnim količinama hrane niti liječenju.

Mešihat Islamske zajednice u Hrvatskoj stoga je dao naputak da se 2. i 9. ožujka organiziraju namjenske sergije za pomoć muslimanima Istočne Ghoute te da se sva prikupljena sredstva prebace na račun Mešihata do 12. ožujka.

Pozivamo vas stoga, da se u granicama svojih mogućnosti, odazovete na sergiju. Svakako, svima nama, ostaje trajna i glavna obveza da u dovama ne zaboravimo napaćenu braću i sestre i da Allahu zahvaljujemo na blagodatima koje su već godinama uskraćene milijunima drugih ljudi. Molimo Allaha, dž.š., da nas učini od onih koji su Mu zahvalni na blagodatima, da nas spasi od zabluda i stranputica, uputi Pravim putem i podari Džennet.

Amin!

Prethodne hutbe potražite na našoj stranici: www.medzlis-split.org
Pripremio: Vahid ef. Hadžić Split, 9.3.2018.
na temelju pisanja hfz. Aziz ef. Alilija

